

Minister di Finanzas Mike de Meza: Post tin director nobo

“Nos tur ta orguyoso di mira un yiu di tera como director di Post Aruba NV”

ORANJESTAD – Post Aruba Nv a haya un director nobo. Minister Mike de Meza a presenta Sr. Guillermo Raymond. E ta un persona cu mas di 28 aña trahando cu Post Aruba NV. Durante e añanan trahando na PostKantoor e la sa di haya su experiencia ya cu e la pasa den tur departamento nan di e empresa

DESAROYO

Post e ultimo 20 añanan a keda confronta cu diferente reto. Competencia a bira grandi for di tempo di telex y fax machine. Na momento di entrada di computer, internet y smartphone, e competencia di post a bira mas difícil. Awendia rond mundo post ta re enfoca su negoshi, caminda cu e ta keda garantisa e entrega di post na cas na un manera adecuado. Tambe ta purba di haci esaki mas lihe cu ta posibel.

Hunto cu esaki e ta brinda diferente productonan nobo cu a keda introduci rond mundo y Aruba no por keda atras. Aruba su post ta importante pa comunidad di Aruba. Tur hende ora cu nan yega cas ta wak den nan postbus pa mira kico Post por a alga atras. Esey ta un trabou importante pa esunnan cu ta traha na Post Aruba

RETONAN GRANDI

Pa e ultimo añanan Post Aruba a haya retonan grandi. E servicio ta pasando den un transformacion pa enfoca su bista den e negoshi di post Aruba NV. Den e proceso aki ta importante pa Post Aruba NV haya un director nobo y tambe pa e director ta un persona cu ta bin for di Post Aruba NV mes. E persona mas adecuado despues di a combersa cu diferente den

servicio di Post Aruba NV, cu sindicatonan y tambe otro profesionalnan den diferente sector, semper e number di e director nobo a bin dilanti.

PLANNAN

Conseho di Minister a bay di acuerdo cu e nombracion aki. E director actual tin un tarea grandi su dilanti pa hiba Postkantoor den e direccion nobo. Post tin derecho di existencia y e intencion ta pa bay traha hunto pa e mehoracion. Minister di Finanzas a indica cu e director nobo ta bay keda asisti pa un tema di profesional pa un periodo di un aña. Ya caba tin diferente plannan riba mesa cu e director nobo mes a presenta na Minister di Finanzas. E mandatario tin tur confiansa cu Sr. Guillermo Raymond cu e ta bay haci un bon trabou. □

Director di Post Aruba Guillermo Raymond

A yega momento pa cuminsa bin cu productonan inovativo pa drecha Post Aruba NV.

ORANJESTAD - “Despues di 28 aña di servicio nunca mi no a kere di a yega asina leu”, asina Sr. Guillermo Raymond, director nobo di Post Aruba NV a bisa. E ta satisfecho di e sosten cu e la ricibi y e guia cu e la haya desde cu e la drenta servicio di post Aruba desde 28 aña pasa.

CAMBIO

Guillermo Raymond a bisa cu e tabata tin amigonan cu e la cuminsa traha cune y un di nan ta Sr. Hector Quillote cu semper a bisa su persona pa sigui pusha dilanti pa e progresa. Despues

di 28 aña cu Raymond tin trahando na Servicio Postal e a mira cu hopi cos a cambia. E entrada di Smartphone nan a haci cu informacion ta facil pa haya.

DEMANDA

Tin un demanda ainda pa servicionan cu post ta brinda, pero mester sigui innova. E director nobo a indica cu e cartanan tradicional a baha durante e añanan cu a transcurre.

Loke si nan a mira ta un tendencia nobo ta e servicio di onlineshopping. Hopi hende ta haciendo uzo di e parti di pakete dor cu nan ta cumpra cos-

nan online tanto for di Hulanda como Merca. Esaki ta un producto cu mester keda crece. Director nobo di Post Aruba NV a bisa cu nan ta trahando hunto cu Duane y e Hoofd Visitatie e servicio ta bay drecha den entrega di e paketenan.

Awor aki e entrega di e paketenan di productonan online ta tarda un poco pa keda entrega, pero post ta trahando riba e proceso aki.

SUBSIDIO

Gobierno ta subsidiando Post Aruba

financieramente, ya cu durante ultimo añanan Post Aruba a cay hopi den su productonan, esaki a haci cu Post mester a bay na Gobierno pa yuda cu e parti financiero. Awor aki tin un tema di transformacion cu ta den man di Sr. Lino Quandt.

E ta den proceso pa haci cambio pa mehora e productonan y tambe pa analisa e mercado pa wak unda e competencia ta. Director di Post Aruba NV a indica cu nan tin bon team y e trahadonan tin e interes pa sigui traha na bienestar di e empresa. □